



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Munisípiu Ermera
9 Novembru 2017

Komunidade Suku Samara kontente ho prezensa JSMP iha sira nia Suku

Iha 9 Novembru 2017, Judicial System Monitoring Programme (JSMP), kontinua habelar informasaun ba autoridade suku, membru konsellu suku no komunidade sira iha Suku Samara, Postu Administrativu Hatolia, Munisípiu Ermera.

Treinamentu ne'e partisipa husi ema na'in 30 ne'ebé kompostu husi xefi aldeia, membru konsellu suku no representante fetu ne'ebé kompostu hosi fetu na'in 18 no mane na'in 12 ne'ebé representa husi aldeia rua.

Materia ne'ebé apresenta iha treinamentu mak hanesan, direitu labarik, obrigasaun atu proteze labarik, protesau labarik tuir lei aplikável inklui lei internasional relevante hanesan Konvensaun ba Direitu Labarik, no tipu krime sira ne'ebé akontese hasoru labarik.

Treinamentu ne'e ho objetivu atu hasa'e koñesementu komunidade sira nian kona-ba direitu labarik, tipu krime hasoru menór sira no oinsá labarik sira bele asesu ba iha justisa formal.

“Treinamentu ne'e importante ba komunidade sira, atu bele sai referénsia ba sira atu hasa'e sira nia koñesementu adisionál hodi prevene sira nia an atu komete krime hasoru labarik no ajuda sira atu fasilita labarik sira asesu ba informasaun loloos kona-ba oinsa atu prosesu kazu sira envolve labarik,” dehan Casimiro dos Santos, Diretór Interinu JSMP.

Xefe Suku Samara Sr. Marcelo Caitano Menezes, iha sesaun abertura apresia no hato'o ninia agradesementu ba ekipa JSMP ne'ebe decide atu lori materia hirak ne'e ba to'o sira nia suku. Sr. Menezes husu ba partisipante sira hotu atu fó atensaun didiak ba materia no ativu hodi husu pergunta liu-liu liga ho asuntu sira ne'ebé akontese iha uma laran no iha komunidade nia leet.

Partisipante sira rekoñese katak mesmu foin primeria-vez tuir treinamentu nomos simu materia hanesan ne'e. Tanba ne'e sira foin hatene kona-ba labarik sira nia direitu no oinsa atu proteze labarik sira. Aleinde ne'e sira mós hateten katak realidade sempre akontese katak inan ho aman sira sempre viola oan sira nia direitu hanesan, viola labarik sira nia direitu atu hetan liberdade no sempre hakilar no siak labarik sira ne'ebé hato'o sira ninia hanoin ba sira ninia inan-aman sira.

Iha enseramentu, Sr. Menezes agradese tebes ba ekipa JSMP ne'ebé fahe ona informasaun ba sira no sira ninia komunidade ne'ebé hetan oportunidade hodi tuir treinamentu ida ne'e. Xefe Suku mós informa ba partisipante sira atu sai nu'udar ponte ida hodi hatutan informasaun sira ne'e ba maluk seluk ne'ebé seidauk hetan oportunidade atu partisipa iha treinamentu ne'e.

Treinamentu ne'e realiza tanba apoiu finânseiru hosi **Embaixada Canada, iha Jakarta Indonézia.**

Atu hetan informasaun kle'an favór kontaktu:

Casimiro dos Santos

Diretór Interino JSMP

Telefone: 3323883, 77257466

Website: www.jsmp.tl,

E-mail: info@jsmp.tl

Facebook: www.facebook.com/timorleste.jsmp

Twitter: @JSMPTl